

Txirritola

ARAMAIO / Barikua / 2005eko ekainaren 24a / 156. zenbakia

KOORDINATZAILEA: Ubane Madera • Otorala Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Aramaioren beharrak helarazi dizkie alkateak Arabako Batzar Nagusiei

UBANE MADERA

Aramaioren arazoak eta beharrak jakinarazi dizkie Mertxe Mondragonek Batzar Nagusiei. Besteak beste, jakinarazi die kostu handia dela Udalarendako herriko errepideak ondo zaintzea eta azpiegiturak-eta sartzek finantzazio handia eskatzen duela.

Batzar Nagusiak Foru Arauaren aldaketa aztertzen dabiltzala-eta, Arabako zenbait udalerritako alkateei dei egin diete euren ikuspuntuak eta proposamenak azaltzeko, herri bakoitzaren egoera kontuan hartuta. Ezaugarri berezidun udalerritako ordezkariak dei egin diete Batzarrek. Aramaioren kasuan, herriko auzoen dispersio egoera dela-eta deitu dute alkatea. Laburbilduta, honako hauxe landu zuten:

FORU ARAUAREKIN LOTUTA

Lehenengo eta behin, Foru Arauarekin lotutako proposamenak aurkeztu zituen Mertxe Mondragonek. Foru Araua da, besteak beste, Arabako udalerrien finantzazioaz arduratzeko ezarritako araua. Horren arabera, aurrekontuaren %54 ematen diete Arabako udalei, euren funtzionamendurako. Aramaioko alkatearen ustez, berriz, komenigarria da kopuru hori handitzea. Halaber, udal bakoitzari ematen dioten kopuru finkoa handitzea ere eskatu zuen: 21.035 eurotik 90.150 euroraino.

Horrez gainera, nabarmendu zuen Aramaio moduko herriendako oso garrantzitsuak direla koadrilak: "Ezinezkoa litzateke udalek euren kabuz, koadrilen laguntza barik, kalitatezko zerbitzuak ematea, horren kostua larregikoa da-eta guretako". Udalendako eta koadrilendako autonomia handiagoa ere eskatu zuen, finantzazioari dagokionez, batik batik koadrilei egokitzen zaien finantzazioa handitzeari dagokionez.

Eskatu zuen, baita ere, obrendako dirulaguntzak emateko orduan, udalerriek dituzten oinarriko beharrei lehentasuna ematea, esaterako, azpiegiturak: saneamendua, argiteria... Horrekin batera, eskatu zuen ezaba deza-



Alkateak nabarmendu zuen Aramaio moduko kasurik ez duela ezagutzen Arabako Lurralde Historikoan.

tela dirulaguntzen bateraezintasuna zehazten duen Foru Arauko artikulua. Eta laguntzak eskatzeko erabiltzen duten tramitazio sistema aldatzea proposatu zuen, errazagoa ipintzeko.

ARAMAIOREN GAINEAN

Hori guztiori azaldu ostean, Aramaiok dituen arazoak azaldu ziz-

*Aramaioko auzoen
dispertsio egoera eta
horrek eragiten
dituen zailtasunak
nabarmendu zituen*

kien batzarkideei. Lehenengo eta behin, herriko auzoen dispersio egoera eta horrek eragiten dituen zailtasunak nabarmendu zituen: "Aramaioko ibarraren egitura horrek egiten du Aramaio idilikoa izatea paisaia aldetik, baina udalerritari ahalegin berezia eskatzen dio egoera horrek, askotan gainezka egiten digu eta ezin gara leku

Kontsiderazio berezia, Aramaiorendako:

Udalerriendako finantzazio handiagoa eskatu zuen. Eta, horrez gainera, obrendako dirulaguntzak emateko orduan oinarriko beharrei lehentasuna ematea.

Horrez gainera, Aramaiok dituen arazoak azaldu zituen, esaterako, Aramaioren egiturak (oso sakabanatuta dauden auzoak) ahalegin berezia eskatzen diola Udalari eta askotan ezin izaten dietela

behar guztiei aurre egin. Adibidez, Arexolako lanek 480.827 euroko kostua dute eta Salgo-Errotabarrikoek 300.500 eurokoa. Horren harira, alkateak nabarmendu zuen Aramaion oinarriko edozein azpiegitura egiteak bestelako proiektuak finantzatzeko aukerak agortzen dituela.

Aramaiorendako finantzazio berezia ere eskatu zuen alkateak.

guztietara iritsi eta ezin diegu aurre egin behar guztiei. Aramaion, oinarriko edozein azpiegitura egiteak (argiteria, saneamendua...) bestelako proiektu edo zerbitzuak finantzatzeko aukerak agortzen ditu".

DATUAK ZENBAKITAN

Batzarkideek herriaren egoera argiago ikusteko, datuak eman zizkien Mertxe Mondragonek: Aramaiok ditu etxeko ura garbitzeko lau araztegi; 52.000 metro ur-hodi; 22 putzu beltz; 20.000 metro errepide bere kargura; bederatzi hilerri; gas propanoaren zortzi biltegi eta 16 argiteria publiko.

Herrian zenbait lan egiteak duen kostuaren berri ere eman zuten: Arexolako lanak egitea (zolatzea, saneamendua...): 480.827 euro; Eguzkierripakoak beste horrenbeste: Salgo-Errotabarrikoak 300.500 euro baino gehiago eta adibidez, herriko uren analisiak egitea 46.700 euro pasatxo kostatzen da. "Ikus dezakezue, Aramaio baino dezente handiagoa den edozein udalerririk duen kostua baino handiagoa da kostu hori. Guztia Aramaioren orografiak eta dispersio egoerak eraginda". Horrez gainera, zerbitzu guztien mantentze-lanez arduratu beharra dago.

ZAILTASUNAK UDALARENDAKO

Eta hori guztiori Aramaiorendako karga dela esan zuen alkateak: "Ausartuko nintzateke esaten Arabako Lurralde Historikoko administrazio batek ere ez duela halarik jasaten. (...) Adibidez, gaur egun baditugu obra batzuk 2000ko Foru Planak onartuta, baina oraindik ezin izan ditugu egin Udalak ezin dituelako finantzatu. Dena den, aurten egitea espero dugu". Zera ere gaineratu zuen: "Horrek guztiak ezinezko egiten du erre-kurtsoak izatea beste mota bateko zerbitzuetarako. Esaterako, Aramaion, nahiz eta 1.500 biztanle izan, ez dugu igerilekurik ezta hura egiteko aurreikuspenik ere".

Horregatik guztiagatik, zera eskatu zuen: "Kontsidera dezazue Aramaiok finantzazio berezia behar duela, nik ez dut-eta antzerako kasurik ezagutzen Arabako Lurralde Historikoan".

TELEFONO JAKINGARRIAK

OSASUNA / LARRIALDIAK	
Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuiko Eskualdea	945 43 01 67
Suhiltzaleak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoaren orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezeran deitu behar dute honako zenbaki honetara: 629 54 59 23

OHARRAK

SAN JUAN JAIK AZKOAGAN

Atzo, eguena hasi ziren auzoko jaiak ospatzen azkoagarrak. Besteak beste, San Juan sua egin zuten eta Azkoagako *sorginen* bisita izan zuten. Eta gaurko eta biharko ekitaldi gehiago antolatu dituzte. Esaterako, 18:00etan mus eta briska txapelketa jokatu dute eta 19:00etan, Pantarey kale antzerkia izango da, plazan. Bihar, berriz, 12:00etan auzoko hildakoen aldeko meza esango dute eta 17:00etan puzgarriak izango dira, gaztetxoentzako.

OMENALDIA UNDARI, ETA UDALETXEAN ATEAK ZABALIK

San Martinak aprobetxatu eta borroka libreko Estatuko txapelkunari ondo merezitako omenaldia egitea erabaki du Udalak. Uztailearen 3an izango da. Besteak beste, mezaren ostean Udaletxean ekitaldi berezia egingo dute Oletako borrokalaria omentzeko. Horrekin batera, Udaletxean berritze-lanak egin dituztela-eta, egun bera aprobetxatu nahi dute herritarrei aukera emateko Udaletxea ikusteko; hori ere mezaren ostean izango da, bazkalordura arte-edo.

Jaien ostean, udako ikastaroak: Euskal Herria 1789-1848

U.M.

Uztailaren 4tik 7ra egingo dute Aramaioko IV. Uda Ikastaroa. Arratsaldean izango dira eskolak, 16:00etatik 20:00ak arte. 1789-1848 bitarteko Euskal Herriaren historia, hizkuntza eta artea aztertuko dituzte. 14 adituk berba egingo dute; tartean, Andres Urrutia euskaltzainburua izango da.

Euskal Herriarendako horren erabakigarria izan zen 1789-1848 garaia ikuspegi zabala eskaintzea da Aramaioko IV. Uda Ikastaroaren helburua. 14 adituk jardungo dute horren gainean lau egunez, 50 bat minutuko hitzaldiak eginez. Horrez gainera, arratsaldero, hitzaldien ondoren, mahai-inguru bat izango da eguneko hizlariarekin.

Hitzaldiak euskaraz, espainieraz edo frantsesez izango dira, hizlariaren arabera. Aldi bereko itzulpen zerbitzua izango da euskarazko eta frantsesezko berbaldietatik espainierara.

HAINBAT UNIBERTSITATEKO HIZLARIAK

Honako hizlari hauek parte hartuko dute ikastaroan: Euskal Herriko Unibertsitateko irakasleak: Alberto Angulo, Jose Maria Ortiz de Orruño, Santiago Piquero, Blanca Urgell, Fernando Bartolome eta Oscar Alvarez Gila. Bestelako uniber-



lazo udako ikastaroek inguruko eta urrunagoko bisitariak erakarri zituzten.

tsitateetatik edo erakundeetatik: Rodrigo Rodriguez Garraza (Konplutensea); Pedro Mantrola (Nafarroako Unibertsitatea); Joaquin Alvarez Barrientos (Ikerketa Zientifikoen Kontseilu Nagusia); Beñat Oihartzabal (Euskaltzaindia eta Iker, Centre National de la Recherche Scientifique); Fermin Arkotxa (Iker); Andres Urrutia (Euskaltzaindia eta Deustuko Unibertsitatea) eta Marie-Claude Berger (Societe des Amis d'Abbadia).

ARGIBIDEAK ETA IZENEMATEAK

Udako ikastaroetan parte hartzeko honako helbideetan eman daiteke izena edo informazioa eskatu: Hurbil Kulturgaiak, SL; Aramaioko IV. Uda Ikastaroa, 160 posta-kutxa, 20550 Aretxabaleta. Edo, aramaio@hurbilkulturgaiak.com edo www.hurbilkulturgaiak.com/aramaio.

Arabako Foru Aldundiak Euskal Herriko Unibertsitatearekin elkarlanean antolatzen ditu Aramaioko Uda Ikastaroak, Henrike Knörren zuzendaritzapean.

Ildo beretik segitzeko asmoa du Txirritola elkarteak

U.M.

Orain arteko jardunaren balorazioa egiteko eta datozen hila-beteotarako helburuak finkatzeko, urteko batzar nagusia egin zuen Txirritola Euskara Elkartek. Balorazio positiboa egin zuen elkarteko lehendakari Txema Abarrategik: "Erronka izan da sortu zenetik hileroko ekintza bat egitea eta lortu dugu, eta batzuk

arrakastatsuak; jende dezente mugitu dugu eta uste dut euskarari mesedetxoa egin diogula".

Txema Abarrategik aipatutako ekintza horietako batzuk dira Sagardo Eguna, Esaera Zaharren II. Bertso Lehiaketa...

Aurrera begira, berriz, ildo beretik segituko dutela adierazi zuen Txirritolako lehendakariak; halaber, berritasunen bat zein beste ere izango dela.



Txirritola elkarteko kideez gainera, zenbait herritarrek parte hartu zuen batzarrean.

LABUR

Kendu egingo dituzte barikuetako zinema emanaldiak

Herritarrek erakutsitako harrera baxuak eraginda, betiko kenduko dituzte barikuetako zinema emanaldiak. Hala jakinarazi digu urte osoan emanaldi horiek antolatzen ibili den Alex Aginagaldek. Hain zuzen ere, gaurko emanaldia izango da urteko azkena. Hala adierazi digu Alex Aginagaldek: "Pena izugarria ematen dit, astero-astero etortzen diren lagun horientatik, baina azken lau asteotan ez gara 12 ikusletik pasa jende gehien etorri den saioan; gutxi gorabehera emanaldi bakoitzeko zazpi pertsona izango ginen".

Horrenbestez, hemendik aurrera, domeketan bakarrik izango dira emanaldiak.

ORAINGO ASTEKO FILMA

Barikuari dagokionez, oraingo honetan, Jean-Pierre Jeunet (*Alien: resurrección, Amélie...*) zuzendari frantziarraren *Largo domingo de noviazgo* film dramatikoa aukeratu dute. I. Munda Gerran, emakume batek bere bikotekidea aurkitzeko egiten duen ahaleginaren gaineko istorioa da. Besteak beste, Audrey Tatou, Gaspard Ulliel eta Jean-Pierre Becker aktoreek parte hartzen dute film horretan. 134 minutu irauten du. 2003-2004an grabatutakoa da.



Hurrengo ikasturtera arte, agur!

Jai giroan agurtu zuten San Martin Eskolako ikasleek 2004-2005 ikasturtea: antzerkiak, play-backa, txiste kontalariak... Ikasleak kultura etxeko taula gainean jo eta su ibili ziren, ikasleak eta irakasleak irribarre eta barreak pitzen. Horren ostean, ondo merezitako oporrak hartzeko garaia iritsi zaie. Hain zuzen ere, barikuan hartuko dituzte, irakasleek iraileko lehen astera arte eta ikasleek bigarrenera arte. /U.M.